



**2018-3**

10. december 2018

Nal. nr./j.nr.: 2017-104-0047

All. nr./notatnr.: 59042

Sull./sagsbeh.: FH/jh

Pineqartoq:

Piffissaq suliamik suliarin-

ninnermut atorneqartoq

**Piffissaq suliamik meeqqap innarluutillip ikiorserneqarnera-  
nut tunngasumik suliarinninnermi atorneqartoq akuerineqar-  
sinnaanngitsoq isorisarialerujussuarlu**

*Arnaq panimmi tapersersortitut ikiortilerneqarnissaanik Qaasuitsup Kom-  
munianut 2013-imi septemberimi qinnuteqaateqarpoq. Tamatumunnga a-  
tatillugu ilaatigut oqaatigaa panini siusinaarluni inunngorsimasoq qaratsa-  
migullu aanaartoorsimasoq.*

*Arnap piffissaq Qaasuitsup Kommuniata suliamik suliarinninnerminut atu-  
гаа Ombudsmandimut allakkatigut 10. februar 2017-imeersutigut naam-  
magittaalliuutigaa.*

*K Kommuni – suliamik Qaasuitsup Kommuniata 1. januar 2018-imi avin-  
neqarnerata kingornatigut tiguisup – Ombudsmandip misissuineranut a-  
tatillugu oqaatigaa kommunip paasinninnera unaasoq piffissaq suliamik  
sularinninnermut atorneqartoq sivisoorujussuusoq ingerlatsinermilu ileq-  
qorissaarnermut naapertuuttuunngitsoq. Kommuni oqarpoq tamanna in-  
narluutilinnut tunngasuni sulisussaaleqinermik pissuteqartoq.*

*K Kommuni Ombudsmandip isumaqatigaa oqarmat piffissaq suliami ma-  
tumani suliarinninnermut atorneqartoq naammaginartuusimannngitsoq.  
Ombudsmandip paasinninnera unaavoq pineqartoq tassaasoq piffissaq  
suliamik suliarinninnermut atorneqartoq akuerineqarsinnaanngitsoq iso-  
risarialerujussuarlu – suliassaqarfimmi pineqartumi sulisussaaleqisoqarsi-  
manera apeqqutaatinnagu.*

*Qinnuteqartoqarneranit Qaasuitsup Kommuniata qinnuteqaammik isummerfiginninnerata ikiorsiiniutillu aallartinneqarnerata tungaanut ukiut pingasut sinnerlugit ingerlasimanerat –inuillu innarluutillit pillugit malittarissat tunngavigalugit ikiorsiisoqarsinnaasoq kommunip aalajangiinerata tungaanut ukiut sisamat sinnerlugit ingerlasimanerat Ombudsmandip naliiinnermini ilaatigut pingaartillugu isiginiarpaa.*

*Ombudsmandip K Kommuni qinnuigaa piffissaq suliamik suliarinninnermut atorneqartoq taamatut siviutigisoq siunissaq ungasinnerusoq eqqarsaatigalugu qanoq iliorluni pinngitsoortinneqarsinnaanersoq isumaliutersuutigeqqullugu.*

*K Kommunip suliami allagaatinik arlalinnik - Qaasuitsup Kommuniata Isumaginninnermi Naammagittaalliuuteqartarfimmut siusinnerusukkut nasissimasaanik - Ombudsmandeqarfimmut, tamanna suliamik Ombudsmandip paasissutissartalersuinnerminut atatillugu qinnutigimmagu, nasissinngitsoorsimanera Ombudsmandip ajuusaarnartorujussuartut aammattaaq isigaa.*

*Ombudsmandip paasinninnera unaammat suliami annertunerusutigut kukkussuteqartoqarsimallunilu sumiginnaasoqarsimasoq Inatsisartut Inatsisinut Ataatsimiititaliaat aamma K Kommunimi kommunalbestyrelsi Ombudsmandi pillugu inatsimmi § 23 tunngavigalugu ilisimatinniarlugit Ombudsmandi aalajangerpoq.*

*(Oqaaseqaat 10. december 2018-imeersoq, j.nr. 2017-104-0047)*

Suliami pineqartut kikkussusiisa ilisarnarunnaarsarneqarneranni taaguutit uku atorneqarput:

A: Naammagittaalliortoq

B: A-p meeraa

K Kommuni: Kommuni Qaasuitsup Kommuniata avinneqarnerata kingornati-  
gut A-p najugarivita

Nunaqarfik X: Nunaqarfik A-p najugarisaa K Kommunimiittoq

Illoqarfik Y: K Kommunimi illoqarfik kommunip allaffeqarfia

Illoqarfik Z: K Kommunimi illoqarfik nunaqarfimmut X-imut qaninnerpaaq

Ombudsmandip oqaaseqaataa:

## **1. Misissuina sumut tunngava?**

**1.1** Suliami B-p tapersorteqarneranut tunngasumi piffissaq Qaasuitsup Kommuniata suliamik suliarinninnerminut atugaa pillugu apeqquummik misissuineq aallunneruniarlugu aalajangerpunga.

Piffissarli suliamik suliarinninnermut atorneqartoq pillugu isumminnginninni suliamik pissusiviusutigullu tunngaviusumik, piffissamik suliamik suliarinninnermut atorneqartumik misissuina tunngavigisaanik, qanoq misissuisi-manera immikkoortumi 2-mi sukumiinerusumik nassuiarpara. Tamatumunnga atatillugu K Kommunip suliamik uanga suliarinninnini suliamik suliarinninera - immikkoortumi 2.3-mi - ilaatigut isummerfigaara.

Suliamik pingaarnerusutigut uanga paasinninera immikkoortumi 3-mi allaaseraara. Piffissaq suliamik suliarinninnermut atorneqartoq immikkoortuni 4-mit 6-imut sukumiinerusumik allaaseraara. Suliap ingerlasimanera oqaaseqaatima kingunitsiannuatigut sukumiisumik allaaseraara.

**1.2.** Oqaaseqaatiga Qaasuitsup Kommuniata 1. januar 2018-imi avinneqarnera pissutigalugu K Kommunimut ingerlatitaavoq. Tulliuttunili suliamik Qaasuitsup Kommuniani aamma K Kommunimi suliarinninnerit isummerfigaakka.

Pisussaaffiit pisinnaatitaaffiillu aamma pisassarisat akiligassallu kommunit nutaat marluk Qaasuitsup Kommunianit 1. januar 2018-imi tigussagaat kommunini suliaasaqarfiit aaqquuteqqinnerata allanngortinneqarneranik

Inatsisartut inatsisaanni nr. 30-mi, 28. november 2016-imeersumi § 19-ikut aalajangersaasoqarnera innersuussutigaara. Aalajangersagaq taanna pillugu oqaaseqaatinit aammattaaq erserpoq kommunalbestyrelsit nutaat oqartussaasunik namminersortunillu kommunalbestyrelsiusimasup suleqateqarnerannik ataatsimut isigalugu ingerlatsilissasut.

**1.3.** Eqqortussaq anguniarlugu oqaatigaara A-p aamma B-p sutigut ikiorserneqarsinnaatitaasimanerat imaluunniit taamatut ikiorsiineq malittarisassat suut tunngavigalugit pisussaasimanersoq isummerfiginngikkiga.

A piffissap Qaasuitsup Kommuniata suliamik suliarinninnermut atugaata sivissusia pissutigalugu taarsiivigineqarsinnaatitaalluni isumaqarluni uannut naammagittaalliummini allannera eqqumaffigaara.

Suliap ilaa taanna allakkani allani isummerfiginiarpara.

Inatsisartut Ombudsmandiat pillugu Inatsisartut inatsisaanni nr. 8-mi, 3. december 2009-meersumi § 14, imm. 1 innersuussutigaara, tassuunalu aalajangersarneqarpoq naammagittaalliuut misissuineramik aallartitsinnermut pissutigissallugu naammannersoq Ombudsmandip aalajangissagaa<sup>1</sup>.

## **2. Piffissamik suliap suliarineqarneranut atorneqartumik uanga misissuinerana**

### **2.1. Suliaq qanoq iliorlunga misissorpara?**

Naammagittaalliuut A-mit tigoreerlugu Qaasuitsup Kommunian 9. marts 2017-imi allaffigaara. Kommuni ilaatigut qinnuigaara suliami allagaatit uannut nassiuteqqullugit, piffissarlu suliamik suliarinninnermut atorneqartoq pillugu oqaaseqaateqaqqullugu.

---

<sup>1</sup> Naammagittaalliuut Ombudsmandi pillugu inatsisip nutaap (Inatsisartut Ombudsmandiat pillugu Inatsisartut inatsisaata nr. 7-ip, 1. juni 2017-imeersup) 1. juli 2017-imi atutilinnginnerani tunnunneqarami Inatsisartut Ombudsmandiat pillugu inatsit 2009-meersoq tunngavigalugu suliar-

Qaasuitsup Kommuniata allakkatigut 23. august 2017-imeersutigut akivaannga. Oqaaseqaalli suliamilu allagaatit kommunip uannut nassiussai misisso-reerlugit isumaqarpunga suliami allagaatinik allanik sulitigusimannngisannik peqarsinnaanera ilimanartoq.

Taamaattumik K Kommuni allakkatigut 5. februar 2018-imeersutigut qinnuigaara suliami allagaatit tamarmik uannut nassiunneqarsimanersut qulakkeeqqullugu. Avannaata Kommunian ilaatigut qinnuigaara suliani B-p ikiorserneqarnissaanik qinnuteqaatinut tunngasuni paasissutissanik imalinni tamani allagaatit uannut nassiuteqqullugit. Oqaatigaara taamatut qinnuigininnermi K Kommunip nunaqarfimmi X-imi allaffiani kommunilluunniit toqorsiviani allagaateqarpat taakku aamma ilanngullugit eqqarsaatigigikka. Kommuni aammattaaq qinnuigaara suliami iliuuserineqarsimasut tamarmik ulluisa allattorsimaffiat uannut nassiuteqqullugu. Kiisalu suliaq pillugu arlallinnik malitseqartitsissutitut apeqquteqarpunga.

K Kommunip suliaq pillugu oqaaseqaat, ullut allattorsimaffiat suliamilu allagaatit arlallit uannut e-mailikkut 16. juli 2018-imeersukkut nassiuppai.

Sulisuma ilaata K Kommuni 2018-imi septemberimi oktoberimilu sianerfigisarpaa, suliami allagaatit tamaasa ilumut tigusimanagerikka qulakkeerniarlugu. Kommunip paasissutissat ataasiakkaat arlallit uannut 24. oktober 2018-imi nassiuppai.

Isumaqarpungali suliami allagaatinik sulitigusimannngisannik peqarnera ilimanartoq. Taamaattumik suliami allagaatit arlallit Isumaginninnermi Naammagittaalliuteqartarfimmit suliamik aamma suliarinnissimasumit 26. oktober 2018-imi pissarsiarakka – taakkunani ilaallutik suliami allagaatit arlallit kommuninit tigusimannngisakka. Suliami allagaatit taakku Naammagittaalliuteqartarfiup, uanga paasisattut, Qaasuitsup Kommunianit 2017-imi novemberimi tigusimavai.

Sulisuma ilaata K Kommuni 2018-imi novemberimi sianerfigaa, suliami allagaatit apeqqutigalugit. Sulisora ilaatigut paasitinnearpoq suliaq B-mut tunngasoq kommunip misissorsimagaa. Taakkuali saniatigut kommunip nunaqarfimmi X-mi illoqarfimmilu Z-imi toqqorsivii suliami allagaatinik amerlane-rusunik Ombudsmandeqarfimmut nassiunneqarsimanngitsunik imaqaarsinnaasut.

## **2.2. Oqaaseqaatinnut tunngaviusoq**

Paasissutissat kommuninit aamma Isumaginninnermi Naammagittaalliuuteqartarfimmit tigusakka arlalitsigut amigaateqartutut ipput.

Taamaalillutik pissutsit arlallit suliami allagaatini tigusanni eqqaaneqarsimanngitsut Qaasuitsup Kommuniata oqaaseqaataani aamma K Kommunip ullunik allattuiffiani allaaserineqarsimapput, taakkulu suliami allagaatini tigusanni uppersarneqarsimanatik.

Taamaalilluni Qaasuitsup Kommuniata oqaaseqaataanit ullunillu allattuiffimmit K Kommunimeersumit ilaatigut erserpoq nakorsap oqaaseqaataa Qaasuitsup Kommuniata 2014-imi februarimi tigusimagaa. Tamannali suliami allagaatini tigusanni uppersarneqarsimanngilaq. Taamaalilluni suliami allagaatini nakorsap oqaaseqaataa 2017-imi martsimeersoq kisimi ilaavoq.

Tassani aamma ilaavoq paasissutissanik 2014-imi februarimit 2016-imi septemberimut tunngasunik ikittuaraannarnik tigusaqarsimanera.

Taamaalillunga oqaatigisariaqarpara suliap ingerlasimanerani iliuuserineqarsimasut tamaasa pillugit sukumiisumik paasissutissat suliami allagaatit Qaasuitsup Kommunianit, K Kommunimit aamma Isumaginninnermi Naammagittaalliuuteqartarfimmit tigusakka tunngavigalugit piginnikkikka. Isumaqarpungali suliaq pisariaqarneratut pilertortigisumik suliarineqarsimanersoq isummerfigisinnaagiga. Eqqortussaq anguniarlugu oqaatigaara kommunip uannut oqaaseqaataani paasissutissat tamarmik eqqortuusut soorunalimi

naatsorsuutigigiga – paasissutissat taakku suliami allagaatini tigusanni up-  
pernarsarneqarsimanerat apeqqutaatinnagu.

Taamaattumik – naak suliami allagaatinik amerlanerusunik kommunip toq-  
qorsiviini peqarsinnaasoq K Kommunip 2018-imi novemberimi uannut paa-  
sissutissiissutigigaluaraa - K Kommuni tamatuminnga misissueqqeqqullugu  
qinnuigissallugu pisariaqanngitsoq isumaqarpunga. Tamatumunnga atatillu-  
gu piffissap uanga nammineq suliamik sulisuliarinninnnut atorneqartartup  
sivisussusiata isiginiarneqarnissaa aamma pingaartippara.

Suliami allagaatit, matumani suliami allagaatit illua'tungaanilu oqaaseqaatit  
ullunillu allattuiffiup assigiinngissutaat ilanngullugit eqqarsaatigalugit, suku-  
miinerusumik allaaserineqarnerat eqqarsaatigalugu suliap ingerlasimane-  
rik allaaserinninneq oqaaseqaatima kinguninnguaniittoq innersuussutigaara.

### **2.3. K Kommunip uanga saaffiginnissutinnik suliarinninnera**

Ombudsmandi pillugu inatsimmi § 18, imm. 1-ikkut aalajangersarneqarpoq  
oqartussaasut il.il. Ombudsmandip sulinerani pineqartunut ilaatinneqartut  
paasissutissanik allagaatinillu il.il. Ombudsmandip tunniuteqqusaanik Om-  
budsmandimut nalunaaruteqarnissaminnut tunniussinissaminnullu pisis-  
saaffeqartut.

Oqartussaasup paasissutissat suliamilu allagaatit piumasakka pissarsiari-  
niarlugit suliniutit pisariaqartut tamatuma nassatarisaanik suliniutigissavai.  
Paasissutissallu Ombudsmandeqarfimmut nassiunneqartut soorunalimi su-  
kumiisuusussaapput.

1996-imi ukiumoortumik nalunaarutima kalaallisuuani quppernemi 29-mi  
tullianilu aamma qallunaatuani quppernermi 23-mi immikkoortoq oqartus-  
saasut paasissutissanik Ombudsmandimut nalunaaruteqartarannut/tun-  
niussisarnerannut tunngasut ilaatigut innersuussutigaakka.

Qulaani oqaatigineqartutut suliami allagaatit arlallit Isumaginninnermi Naammagittaalliuuteqartarfimmit 2018-imi oktoberimi tiguakka. Paasivara suliami allagaatit taakku Qaasuitsup Kommunianeersuusut, Naammagittaalliuuteqartarfiullu suliami allagaatit taakku Qaasuitsup Kommunianit 2017-imi novemberimi tigusimagai. Suliaq manna pillugu paasissutissat arlallit kommuninit siusinnerusukkut tigusimanngisakka – soorlu suliami allattuiffiit 23-t - Naammagittaalliuuteqartarfimmit tiguakka, suliamili allattuiffik ataa-siinnaq kommuninit tigullugu.

Uanga paasinninnera unaavoq K Kommunip suliami allagaatinik arlalinnik suliamik uanga paasissutissartalersuininnut atatillugu nassiusseqquganni – Qaasuitsup Kommuniata Isumaginninnermi Naammagittaalliuuteqartarfimmut siusinnerusukkut nassiussimasaanik - Ombudsmandeqarfimmut nassiussinngitsoornera ajuusaarnartorujussuusoq. Oqaatigaara paasissutissat Qaasuitsup Kommunianit tigusakka amigaateqartutut ittut allakkanni 5. februar 2018-imeersuni K Kommunimut malugeqqullugu oqaatigigiga, taamatuttaarlu sulisuma ilaata K Kommuni oqarasuaatikkut arlaleriarluni qinnuigisarsimagaa suliami allagaatinik tamanik tigusisimanissara qulakkeeqqullugu.

### **3. Suliap pingaarnerusutigut ingerlasimanera**

A-p panimmi B-p ikiorserneqarnissaa Qaasuitsup Kommunianut allakkatigut 23. september 2013-imeersutigut qinnuteqaatigaa. B 2011-imi novemberimi inunngorsimavoq, taamaalillunilu qinnuteqaateqarnerup nalaani marlungajannik ukioqarluni. Kommunimut allakkanit taakkunannga ilaatigut makku erserput:

“Meeraq meeqqatuulli allatut nukittutigingilaq. Uanga nammineq anaanatuut allangaqalaarpunga.

2012 qaammat august imalt. sept. meeqqaniittaleraluarami aatinneqartarmat unitsinnikuungakku.

Massakkut pisariaqarsoringakku allakkatingut ingerlatitsivunga.



Qaammatinik 7-inik qaammateqarluni inuuvoq (inortuulluni), naartuunermini imalt. inuunermini aanaartuulaarnikuusoq oqaatingineqarnikuuvoq, taamaattumik meeqqatut allatut nukittutinginnginnami.

Anaanaalluni nukissornalaarami; apeqqutingilaarusukkinga støtteqalersinnaanera ajornarnersoq? Neriuppunga akineqassallunga.”

A-p qanoq ikiorserneqarnissani kissaatigineraa taassuma allagaani erseqqivissumik takuneqarsinnaangilaq. Suliamili allattuiffiup 1. oktober 2013-imeersup Qaasuitsup Kommunianeersup assilinera Isumaginninnermi Naamagittaalliuuteqartarfimmit tiguara. Tassani ilaatigut takuneqarsinnaavoq B-mut tapersersortitut ikiortimik pissarsiniarluni A kommunimut saaffiginissimasoq.

Ullut allattorsimaffiat K Kommunimeersoq imatut paasivara nakorsap B pillugu oqaaseqaataa nunaqarfimmi X-mi ingerlatsiviup 2013-imi oktoberimi tigusimagaa. Qaasuitsup Kommuniata oqaaseqaataanit 23. august 2013-imeersumit erserpoq nakorsap oqaaseqaataa ingerlatsivimmit tiguneqarsimansoq nalorninarloq. Nakorsap oqaaseqaataa taanna suliami allagaatini tigusanni ilaanngilaq.

Immersugassaq B pillugu paasissutissanik arlalinnik imalik A-p 10. januar 2014-imi atsiorpaa. Tamanna imatut paasivara immersugassani tassani paasissutissat B inunnik innarluutilinnik ikiorsiisarneq pillugu malittarisassani nassuiarneqartutut annertuumik innarluuteqartuunersoq malittarisassallu taakku tunngavigalugit ikiorserneqarsinnaatitaanersoq naliliiniarnermi Qaasuitsup Kommuniata atugassarigai. Malittarisassat sukumiinerusut kommunip suliarinninnermini aallaavigisai suliap ingerlasimaneranik allaaserinninnermi oqaaseqaatima kingunitsiannguaniittumi oqaatigineqarput.

Qaasuitsup Kommuniata oqaaseqaataani aamma ullut allattorsimaffianni K Kommunimeersumi takuneqarsinnaavoq nakorsap oqaaseqaataa Qaasuitsup Kommuniata 2014-imi februarimi tigusimagaa – nakorsalli oqaaseqaataa taanna suliami allagaatini tigusanni aamma ilaanngilaq.

Paasivara Qaasuitsup Kommunia 2014-imi februarimit 2017-imi januarimut suliamik suliarinninnermi avammut sammititaasunik annertunerusutigut i-liuseqarsimangitsoq.

A-p Qaasuitsup Kommunia suliami akissuteqaqqullugu 2016-imi nukingisaarpaa – allakkat assilinerat atuarneqarsinnaanngiusartog tiguara, taamaattumillu allakkat aprilimeersuunersut septemberimeersuunersulluunniit takusinnaanagu. Allakkat taakku akineqarsimanersut suliami allagaatini takuneqarsinnaanngilaq.

Paasivara meeqqanik inuusuttunillu Siunnersuisarfiup illoqarfimmi Y-miittup Qaasuitsup Kommunia suliami aalajangeeqqullugu A sinnerlugu 2017-imi januarimi nukingisaarsimagaa.

Qaasuitsup Kommuniata immersugassaatai arlallit A-p 2017-imi januarimi atsiorpai. Tamanna imatut paasivara immersugassat taakku B inunnik innarluutilinnik ikiorsiisarneq pillugu malittarisassani nassuiarneqarsimasutut annertuumik innarluuteqartuunersog aamma malittarisassat taakku tunngavigalugit ikiorserneqarsinnaatitaanersog Qaasuitsup Kommuniata naliliiniarnerani aamma atorineqartussaasut.

Aammattaaq paasivara kommunip nakorsamit paasissutissat amerlanerusut naliliiniarnermi tassani atugassat pissarsiariniarsimagai, B-llu meeqqanik inuusuttunillu tapersersuineq pillugu malittarisassat tunngavigalugit tapersersortitut ikiortilerallarneqarnissaa kommunip suliamik suliarinninnerup ingerlanerani suliniutigisimagaa.

Suliami allagaatinit erserpoq B meeqqanik inuusuttunillu ikiorsiisarneq pillugu malittarisassat innersuussutigalugit 2017-imi februarip aallartisimalernerani tapersersortitut ikiortilerneqarsimasog. Oqaaseqaatini ullullu allattorsimaffianni oqaatigineqarpoq tapersersortitut ikiorti 10. februar 2017-imi aallartissimasog.

Piffissaq Qaasuitsup Kommuniata suliamik suliarinninnerminut atugaa A-p uannut 10. februar 2017-imi naammagittaalliuutigaa. Paasissutissat arlallit Qaasuitsup Kommunianit aamma – kommunip avinneqarnerata kingornatigut – K Kommunimit tamatuma kingornatigut pissarsiariniarpakka. Tamanna immikkoortumi 2-mi sukumiinerusumik allaaseraara.

B pillugu oqaaseqaat illoqarfiup Z-ip peqqissaaviani nakorsap 18. marts 2017-imi suliaraa.

B inunnik innarluutilinnik ikiorsiisarneq pillugu malittarisassat tunngavigalugit tapersersortitut ikiortilerneqarsinnaatitaassasoq kommunimi innarluutilinnut tunngasuni aalajangiisartoqatigiinnut inassuteqaat Qaasuitsup Kommuniata 2017-imi majimi suliaraa.

Imatut paasivara inassuteqaat taanna 5. september 2017-imi akuerineqarsimasoq, tamatumalu kingornatigut Qaasuitsup Kommunia 2017-imi ukiap ingerlanerani aalajangiisimasoq B inunnik innarluutilinnik ikiorsiisarneq pillugu malittarisassani pineqartunut ilaatinneqartoq.

#### **4. Qaasuitsup Kommuniata aamma K Kommunip oqaaseqaataat**

Paasivara piffissaq A-p qinnuteqaataanik Qaasuitsup Kommuniata naliliiniarnerminut atugaata sivilissusua kommunimi innarluutilinnut tunngasuni suliaqarfimmi tassani sulisussaaleqinermik pissuteqartoq.

Taamaalilluni Qaasuitsup Kommunia uannut oqaaseqaammuni ilaatigut imatut allappoq:

“Suliaq misissorneqarpoq [uanga paasisattut 2017-ip aallartinnerani; uanga ilanngussara] siusinnerusukkut suliakkiussa qanoq ingerlasimanersoq. Meeraq pillugu paasissutissanik nunaqarfimmi X-imi sullissisumut piniarnermi nakorsaq oqaaseqaasiortinneqarsimavoq, taannalu innarluutilinnut sullissisumut ingerlateqqinneqarsimavoq, sulisoqarnerli pissutaalluni uninngatinneqarsimammat suliaq aallarteqqinneqarsimalluni december 2016.

[...]

Handicap sagsbehandlereqanngittarnerani suliaq unittarsimalluni. Aatsaat maj 2017 ingerlanerani pappilissat B pillugu innarluutilittut nalunaarsornissamut paasissutissat illoqarfimmi Y-mi beslutning teamimut ingerlatinneqarsimallutik.”

Tamatuma pissuseqatai K Kommunip uannut oqaaseqaataanit ilaatigut er-serput:

“Innarluutilinnik nalunaarsuiniarneq ajoraluartumik assut arriissimavoq, tassami innarluutilinnik sullissisoqarsimanngimmat. Innarluutilittut nalunaarsorneqarnissap tungaanut meeqqat pillugit inatsit tunngavigalugu tapersersortitut ajoraluartumik aamma ikiortiliisoqartarsimanngilaq. [...]

Tapersersortitut ikiortiliiniarnermi innarluutilittullu nalunaarsuiniarnermi piffissap suliamik suliarinninnermut atorneqartup ajoraluartumik taama sivistigisariaqarsimanera aamma ingerlatsinermi ileqqorissaarnerunngilaq.” (Ombudsmandeqarfimmi nutsigaavoq)

## **5. Piffissaq suliamik suliarinninnermut atorneqartoq qaqugukkut si-visuallaartarpa?**

**5.1.** Piffissaq qanoq sivistigisoq pisortani oqartussaasup sulianik suliarinninnermut atortassagaa ataatsimut malittarisassaqaqanngilaq. Naatsumik oqaatigalugu nalinginnaasumik ilimagineqarpoq suliat pisariaqarneranit sivi-sunerusumik suliarineqartannginnissaat ingerlatsinermi ileqqorissaarnerup nassatarigaa.

Eqqortussaq anguniarlugu oqaatigaara apeqqummik taassuminnga misissuinninni Danmarkimi inatsisilerineq pillugu atuakkiat/allaaserisat aamma Folke-tingip Ombudsmandiata periaasia ilanngunniarikka, tassami uanga paasininnera unaammat suliassaqarfimmi tassani inatsiseqartitsinikkut tunngavik Kalaallit Nunaanni Danmarkimilu assigiittoq.

Suliani siusinnerusukkut suliarisanni arlalinni – soorlu suliami 2009-imi ukiumoortumik nalunaarutinni immikkoortumi 5-7-2-mi ilanngunneqartumi – piffissaq suliamik suliarinninnermut atorneqartoq pillugu piumasaqaatip allaaserineqarnera eqqarsaatigalugu Namminersornerullutik Oqartussat Inat-

sisileriffiata suliassat suliarineqartarnerat pillugu inatsit pillugu ilitsersuusiani 1994-imi decemberimi saqqummersinneqartumi imm. 199 aamma 204 innersuussutigisarpakka. Ilitsersuummit ilaatigut makku erserput:

“**199.** Suliassat tamarmik pisortat ingerlatsiviini suliarineqartut soorunami sapinngisamik pisariitsumik, sukkasuumik aningaasartuutaavallaanngitsumillu suliarineqartarnissaannik piumasaqaat pingaartunik atuuppoq suliassanut inuit ataasiakkaat imaluunniit namminer-sorlutik ingerlatseqatigiiffiit, suliffeqarfiit, peqatigiiffiit il.il. attuumassuteqarfigisaanni.

[...]

**204.** Suliassat suliarineqartarnerat pillugu inatsit suliassat qanoq sivilutigit sumik suliarineqartarnissaat pillugu nalinginnaasunik aalajangersagartaqanngilaq. Tamatumunnga ilaatigut tunuliaqutaavoq suliassat pisortat ingerlatsiviinit suliarineqartartut assigiinngeqimmata assigiinngeqisunillu annertussuseqartarlutik, taamaattumik inatsisikkut pisortat ingerlatsiviini qanoq sivilutigit sumik suliarineqartarnissaasa aalajangersimasumik maleruagassiornissaat ajornarlunnartussaalluni, tassa eqqartuussivinni ajornarpallaanngitsumik atortinniarneqarsinnaasunik.

Kisiannili Folketingip Ombudsmandiata oqaaseqaatigisartagai tunngavigalugit nalinginnaasumik ingerlatsinermi ileqqut kusanartut malinniarneqarnissaanni suliassat qanoq sivilutigit sumik suliarineqartarnissaat pillugu tunngavigineqarsinnaasunik suliassat suliarineqartarnissaasa aqqissugaasarnissaat pillugu maleruagassaqaartitsineqarpoq, matuma ataani suliamut tunngassuteqartup suliap qanoq sivilutigit sumik suliarineqassangatinneqarneranik ilisimatinneqartarnissaa pillugu.

Ombudsmandip aammattaaq aalajangikkat ilaanni tikkuaavigisarsimavaa suliat sivilutigit sumik aalajangiivigineqaratik uninngatinneqartarnissaat pinaveersaarniarlugu kiisalu puigortoorneqarlutik aalajangivigineqanngitsoortarnissaat pinaveersaarniarlugu oqartussaasut *naammattunik atorsinnaalluartunik suliat uterfigineqaqqittarnissaannut allattuiffiliortarnissaat.*”

Tassa suliap sapinngisamik pilertornerpaamik suliarineqarnissaanik oqarnermi sorpiaap pineqarnera suliamit suliamut aalajangerneqartartussaavoq.

Suliaq pisariaqarneratut pilertortigit sumik suliarineqarsimanersoq apeqqummi suliap pissusia, oqartussaasup suliani taamaattuni piffissaq sulianik suliarinninnerminut atortagaa nalinginnaasoq, suliap ajornakusuussusia, suliami ingerlaavartumik iliuuserineqartut kiisalu suliaq paasissutissartalersorniarlu-

gu iliuutsit piffissartornartut iliuuserineqassanersut ilaatigut aalajangiisooqa-taasarput.

Suliami 2011-imi ukiumoortumik nalunaarutinni ilanngunneqartumi immik-koortoq 5.7.1 kiisalu 2005-imi ukiumoortumik nalunaarutima qallunaatuani qupperneq 57 kalaallisuanilu qupperneq 69 ilaatigut innersuussutigaakka.

Pisortani oqartussaasut piffissaq sulianik suliarinninnerminnut atortagaat pillugu piunasaqaatinik ataatsimut allaaserinninneq eqqarsaatigalugu Niels Fengerip allallu atuakkiaani "Forvaltningsret"-imi 2018-imeersumi qupper-nerit 688 tulluilu, Sten Bønsingip atuakkiaani "Forvaltningsret – Sagsbe-handling, Hjemmel, Prøvelse"-mi 2003-mi tallimassaannik saqqummersin-neqartumi qupperneq 197 innersuussutigaakka.

**5.2.** Pisuni aalajangersimasuni oqartussaasumi namminermi pissutsit tas-saapput suliap piffissami sivisuumi suliarineqarneranut pissutaasartut. Soor-lu suliasat amerliartornerat, sulisussarsiniarnermi ajornartorsiutit atugas-siissutilluunniit amigartut piffissap suliamik suliarinninnermut atorneqartup sivisunerulerneranut pissutaasinnaapput.

Kalaallilli Nunaanni Danmarkimilu Ombudsmandit periaasianni ilimagineqar-poq suliasaqarfimmi piffissamik suliamik suliarinninnermut atorneqartumik ataatsimut akuerineqarsinnaasumik naliliinermi pissutsit oqartussaasumut sulisunullu tunngasut isiginiarneqartassanngitsut, tassami naliliineq tunnga-vimmik kinaassusersiunngitsumik tunngaveqartariaqarmat.

Taamaalilluni oqartussaasumut atugassiissutit amigarnerat piffissap sulias-saqarfimmi pineqartumi suliamik suliarinninnermut atorneqartup nalingin-naasumik akuerineqarsinnaasup sivitsornerannut pissutaaqataasinnaangi-laq. Pissutsit taamaattut pisuni aatsaat immikkorluinnaq ittuni piffissap su-liamik suliarinninnermut atorneqartup sivisunerusup innuttaasumit akueri-neqartariaqarneranut pissutaasinnaapput.

Suliaq 2005-imi ukiumoortumik nalunaarutinni immikkoortutut 5.97.1-itut ilanngunneqartoq ilaatigut innersuussutigaara, pingaartumik nalunaarutip qallunaatuaani quppernerit 134 tullialu aamma kalaallisuuani qupperneq 169.

Folketingip Ombudsmandiata oqaaseqaataani isummat taakkununga assingusut aammattaaq innersuussutigaakka, assersuutigalugu suliaq 2011 5-3 ([www.ombudsmand.dk](http://www.ombudsmand.dk)-mi atuarneqarsinnaasoq), piffissamut Kalaallit Nunaanni oqartussaasup suliamik suliarinninnerani atorneqartumut tunngasoq. Folketingip Ombudsmandia ilaatigut allappoq oqartussaasumi pissutsit – matumani sulisussarsiniarnermi ajornartorsiutit ilanngullugit eqqarsaatigalugit – suliassaqarfimmi piffissamik suliamik suliarinninnermut atorneqartumik akuerineqarsinnaasumik naliliinermi ilanngunneqarsinnaanngitsut.

Suliamut oqartussaasumi namminermi pissutsit piffissamik suliamik suliarinninnermut atorneqartumik naliliinermi sunniuteqartitsilluni isiginniffiusimasutut assersuutigalugu suliaq Folketingip Ombudsmandiata 2008-imi ukiumoortumik nalunaarutaani quppernerna 488-imi tulliinilu ilanngunneqartoq innersuussutigaara. Tassani kommunimi piffissap sulianik suliarinninnermut atorneqartartup kommuninik iluarsaaqqinnerup nalaani sivisunerulernera paasisinnaallugu Ombudsmandip oqaatigaa.

Kiisalu Niels Fengerip allallu atuakkiaanni "Forvaltningsret"-imi 2018-imeersumi quppernerit 690 tullialu innersuussutigaakka.

## **6. Suliami matumani piffissamik suliamik suliarinninnermut atorneqartumik uanga naliliinera**

K Kommuni isumaqatigaara oqarmat piffissaq suliami matumani suliarinninnermut atorneqartoq naammaginartuusimangitsoq. Taamaalilluni pineqartoq tassaavoq piffissaq suliamik suliarinninnermut atorneqartoq akuerineqarsinnaanngitsoq isorisarialerujussuarlu – suliassaqarfimmi pineqartumi sulisussaaleqisoqarsimanera apeqqutaatinnagu.

A-p panimminut tapersersortitut ikiortimik qinnuteqarneranit Qaasuitsup Kommuniata qinnuteqaammik isummerfiginninnerata ikiorsiiniutillu aallartinneqarnerata tungaanut ukiut pingasut sinnerlugit ingerlasimanerat – B-lu inunnik innarluutilinnik ikiorsiisarneq pillugu malittarisassat tunngavigalugit ikiorserneqarsinnaatitaasoq kommunip aalajangiinerata tungaanut ukiut sissamat missaasa ingerlasimanerat naliliininni pingaartillugit isiginiarpakka.

Piffissami ukiut pingasut missaannik sivissuseqartumi – 2014-imi februarimit 2017-imi januarip tungaanut – suliamik suliarinninnermi iliuutsinik avammut sammititaasunik pingaaruteqartunik iliuuseqartoqarsimagunanginnera sakkortusaataasutut aammattaaq isigaara.

## **7. Naggasiutaasumik oqaaseqaatit**

Isumaqarpunga suliaq manna piffissaq suliamik suliarinninnermut atorneqartoq taama sivistigisoq siunissami qanoq iliorluni pinaveersaartinneqarsinnaanersoq isumaliutersuuteqalersitsisariaqartoq.

Taamaattumik K Kommuni qinnuigaara oqaaseqaatima kommuni qanoq iliuuseqarnissaanut pissutissaqalersinneraa uannut nalunaarutigeqqullugu.

Uanga paasinninnera unaammat suliami annertunerusutigut kukkussuteqartoqarsimallunilu sumiginnaasoqarsimasoq Inatsisartut Inatsisinut Ataatsimiititaliaat aamma K Kommunimi kommunalbestyrelsi Ombudsmandi pillugu inatsimmi § 23 tunngavigalugu ilisimatippakka. Taamaalilluni Ombudsmandi pillugu inatsimmi § 23-ikkut aalajangersarneqarpoq pisortat ingerlatsivianni kukkussuteqartoqarsimanissaa imaluunniit sumiginnaasoqarsimanissaa ilimagisariaqartoq Ombudsmandip misissuinerata takutippagu Ombudsmandi suliaq pillugu Inatsisinut Ataatsimiititaliamut tamatumunngalu peqatigitillugu Naalakkersuisunut imaluunniit kommunalbestyrelsimut nalunaaruteqassasoq.

Isumaginninnermut Inatsisinillu Atuutsitsinnermut Naalakkersuisoqarfik suliamik ilisimatinniarlugu aammattaaq aalajangerpunga.



Oqaaseqaat manna oqaaseqaammi pineqartut kikkuussusii ilisarnarunnaarsillugit nittartakkakut tamanut saqqummiunneqarumaarpoq, 2018-imillu ukiumoortumik nalunaarutinni eqqaaneqarumaarluni.

## **SULIAP INGERLASIMANERANIK ALLAASERINNINNEQ**

[Suliap ingerlasimaneranik allaaserinneqqaarnerup ilai pineqartut kikkuususiinik ilisarnarunnaarsakkami ilanngunneqanngillat. Oqaasertaliussat sumi peerneqartarsimanerat takuneqarsinnaavoq; uanga ilanngussara]

Suliami allagaatini arlalinni – soorlu akuersinermut uppernarsaammi 20. januar 2017-imeersumi – oqaatigineqarpoq panimmi B-p ikiorserneqarnissaanik A 2012-imili qinnuteqaateqarsimasoq. Taamaalilluni B-mut iliuusissanut pilersaarummit 26. januar 2017-imeersumit erserpoq “suliaq manna anaanaasumit 2012-imili aallartinneqarsimasoq, suliarli ajoraluartumik uninngasimasoq”. Suliamili allagaatinik 2012-imeersunik tigusaqanngilanga.

Taamaalilluni suliami allagaatinit tigusannit allakkatigut 23. september 2013-imeersutigut aatsaat uppernarsaatissaqalerpoq B-p ikiorserneqarnissaa A-p Qaasuitsup Kommuniarut qinnuteqaatigisimagaa. Qaasuitsup Kommuniata aamma K Kommunip aammattaq oqaatigaat suliaq tamatuma naalani aallartissimasoq. A-p allagaanit ilaatigut makku erserput:

“Meeraq meeqqatuulli allatut nukittutiginngilaq. Uanga nammineq anaanatuut allangaqalaarpunga.

2012 qaammat august imalt. sept. meeqqaniittaleraluarami aatinneqartarmat unitsinnikuungakku.

Massakkut pisariaqarsoringakku allakkatingut ingerlatitsivunga.

Qaammatinik 7-inik qaammateqarluni inuuvoq (inortuulluni), naartuunermini imalt. inuunermini aanaartuulaarnikuusoq oqaatingeqarnikuuvoq, taamaattumik meeqqatut allatut nukittutinginnginnami.

Anaanaalluni nukissornalaarami; apeqquingilaarusukkinga støtteqalersinnaanera ajornarersoq? Neriuppunga akineqassallunga.”

Qaasuitsup Kommuniata suliami allattuiffiata 1. oktober 2013-imeersup assilinera Isumaginninnermi Naammagittaalliuuteqartarfimmit tiguara. Tas-

sannga ilaatigut erserpoq A kommunimut saaffiginnissimasoq, B tapersersortitut ikiortilertinniarlugu.

Suliami allagaatinit tigusannit erserpoq Qaasuitsup Kommuniani illoqarfimmi Z-imi sulisup kommunip nunaqarfimmi X-imi sulisua qinnuigisimagaa A-p ineqarneranut tunngasut pillugit paasissutisseeqqullugu. Kommunip nunaqarfimmi X-imi allaffia B pillugu nakorsap oqaaseqaataanik peqarnerasoq illoqarfimmi Z-imi sulisup aamma apeqqutigisimavaa. Suliami allattuiffimmit erserpoq A-p kommunimi sulisoq pissutsit taakku pillugit 14. oktober 2013-imi oqaloqatigisimagaa.

Suliap ingerlanerani ullut allattorsimaffianni K Kommunimit tigusanni 17. oktober 2013-imi allassimavoq: "Nakorsap oqaaseqaataa nunaqarfimmi X-imi tigusimavaat". Tamatuma saniatigut Qaasuitsup Kommuniata oqaaseqaataanit erserpoq nakorsap oqaaseqaataa 17. oktober 2013-imi ullulerneqartoq suliarineqarsimasoq, nakorsalli oqaaseqaataa taanna ingerlatsiviup tigusimaneraa kommunip ilisimannigikkaa. Suliami allagaatini kommunimit tigusanni takuneqarsinnaavoq nakorsap oqaaseqaataanik suliamut aatsaat 2017-imi martsimi ikisisoqarsimasoq.

Qaasuitsup Kommuniata immersugassaataa "Pineqartoq – inunnik sullissinermi misissuineq" A-p 10. januar 2014-imi atsiorpaa.

Immersugassami tassani inunnik annertuumik innarluutilinnik ikiorsiisarneq pillugu Inatsisartut peqqussutaanni nr. 7-imi, 3. november 1994-imeersumi § 3 aamma inunnik annertuumik innarluutilinnik ikiorsiisarneq pillugu Namminersorlutik Oqartussat nalunaarutaanni nr. 19-imi, 16. december 2010-meersumi § 5 innersuussutigineqarput. Aalajangersagaq taanna inunnik annertuumik innarluutilinnik ikiorsiinermut tunngasuupput.

Immersugassamit immersorneqarsimasumit ilaatigut erserpoq B-p timaata illua'tungaa illua'tungiminit nukillaanganerusoq, angajoqqaallu tapersersortitut ikiorteqarnissartik pisariaqartikkaat, "taamaalilluni B-p anaana B-p ta-

persersortitut ikiorteqarnerani suliffissarsiornissaminut periarfissarissaarne-rulersinnaaqqullugu”.

K Kommunimi sulisup sulisuma ilaannut oqarasuaatikkut 5. november 2018-imi oqaatigaa immersugassaq qulaani taaneqartoq illoqarfimmut Y-mut suliamik suliarinninnerup ingerlaqqiffissaanut nassiunneqarsimanersoq nalorninartoq. Taamaattumik immersugassaq taanna nunaqarfimmi X-imi illoqarfimmiluunniit Z-imi kukkunikkut uninngatiinnarneqarsimasinnaavoq.

K Kommunip ullunik allattuivianit aamma suliami allattuiffimmit Isumaginninnermi Naammagittaalliuuteqartarfimmit tigusannit erserpoq nakorsap oqaaseqaataa Qaasuitsup Kommuniata 5. februar 2014-imi tigusimagaa. Nakorsalli oqaaseqaataa taanna suliami allagaatini tigusanni ilaangilaq.

Suliami allattuiffik 31. maj 2014-imeersoq Isumaginninnermi Naammagittaalliuuteqartarfimmit tigusara imatut paasivara nakorsap B pillugu oqaaseqaataa Qaasuitsup Kommuniata 2. juni 2014-imi akilersimagaa.

Qaasuitsup Kommuniani sulisut 2014-imi oktoberimi e-mailerfigeqatigiittarneranni nassiunneqarsimasut arlallit tiguakka. Allaffigeqatigiittarsimanerup taassuma suna siunertarisimaneraa paasiuminaatsippara.

Tamatuma kingornatigut Qaasuitsup Kommuniata ullunik allattuivianit oqaaseqaataanillu erserpoq A 2015-imi nangersinissaminut ikiorserneqarsimasoq kiisalu pisortanit ikiorsiissutinik ikiorserneqarsimasoq. Suliamili allagaatinik 2015-imeersunik tigusaqanngilanga.

A tamatuma kingornatigut Qaasuitsup Kommunianut allappoq. Allakkat tigusakka atuaruminaatsorujussuupput, taamaalillungalu allakkat 23. april 2016-imi imaluunniit 23. september 2016-imi ullulerneqarsimanersoq erseqqissumik takusinnaanagu. Allakkanit ilaatigut makku erserput:

“B-mut suliat sumut killinnersut pingaartumik paaserusuppakka. [...]

Siunnersorneqarnera pillugu saaffigineqqippunga støtte uannut atuutilernissaa pingaartoq aallaavingalugu. B-p inunnguusianut tunngatillugu suliniarnera ajornakusoortarami paarsisussaaruttarneq aallaaviulluni. Una nassiunnerani suliarisimasat ilannguteqqinneqarput ingerlatinneqarsimasut suliaasimangimmata.”

Ullunik allattuiffimmi tulliuttoq tassaavoq 23. december 2016-imi allanneqarsimasoq, tassanngalu erserpoq B-p innarluutilittut nalunaarsorneqartusaaanera innarluutilinnik sullissisumut eqqaasitsissutigineqarsimasoq. Suliami allattuiffik taassuma assinganik ullulik Isumaginninnermi Naammagittaalliuteqarfimmit tiguara, tassanngalu erserpoq A kommunimut saaffiginnissimasoq, suliarlu aallartinneqassasoq.

Illoqarfimmi Y-mi Qaasuitsup Kommuniani sulisoq illoqarfimmi Z-imi isumaginnittoqarfimmut tamatuma kingornatigut allappoq. Allakkat assilinerat tigusara 20. januar 2017-imi ullulerneqarsimavoq, tiguneqartutulli 24. januar 2016-imi naqissuserneqarsimalluni. Ullunik allattuiffimmi 1. februar 2017-imi allassimavoq: “MISI-p allagai tiguneqarput, innarluutilinnilli sullissisoqarsimanginneq sivisoqimmat suliaq attorneqarsimanani. Aalajangerneqarporli innarluutilittut nalunaarsorneqarnissaata tungaanut tapersersortitut ikiortilerneqassasoq.” Tamanna imatut paasivara allakkat qulaani taaneqartut 2017-imi januarimi nassiunneqarsimasut. Allakkanit taakkunannga ilaatigut makku erserput:

“Una allagaq B-p arnaa A, [...], sinnerlugu allagaavoq.

B aasaq 2017 atualertussaavoq, maannakkumullu innarluutilittut nalunaarsugaannginnerani atualernermini timimigut innarluuteqarnera pissutigalugu ikiortariaqarnissaa suli inissimangilaq.

[...]

Taamaattumik suliaq qangali ingerlasimasoq piaartumik suliareriarlugu ilaqutariit ikiorserneqartariaqartut MISI [...]-miit isumaqarpugut.”

Qaasuitsup Kommuniata immersugassaataa "Akuersinermut uppernarsaat" A-p 20. januar 2017-imi atsiorpaa. Immersugassamit immersorneqarsimasumit ilaatigut makku erserput:

"Ajornartorsiut:

B inuungami qaratsaminik aanaartuulaarnikkuunera, taamaammat illua'tungaa nukillannganera peqqutaalluni pisariaqartitsingami.

[...]

2012-iminngaanniit allagaqarlunga aallaartissimavunga støtteqalernissaa arlaatigut ikiorserneqarnissaa [...] aallaavingalugu, tassani soorunami nakorsap oqaaseqaataa ilaatinneqarpoq. Kisianni qaammat august/september 2016 paasiniaasimavunga B pillugu suliaq qanoq ingerlanersoq, [...], tassani paasisimavara taamanili 2012-iminngaanniit allagaqartarnikka uninngatiinnarneqartut, anaanaalluni ilungersuummernarpoq nakkaallattutut missinnarluni assut artornalaarluni. Ukiuni taakkunani utaqqinera imaannaanngesaaq. Aasaru august ukioq atuarfiusoq aallartippat atualertussaavoq, meeqqat ornittangaanni ineriartorluarpoq atualernissaminullu angummateqqalluni, [...].

Apeqquut misissuinermit:

Innarluutilittut støtteqarnissaa MISI tapersiisinnanersoq."

Qaasuitsup Kommuniata immersugassaatai pingasut A-p 26. januar 2017-imi atsiorpai. Immersugassat taakku tamarmik inunnik annertuumik innarluutilinnik ikiorsiisarneq pillugu malittarisassanut innersuussutininik imaqarput.

Immersugassamit "Pineqartoq – akuersilluni uppernarsaaneq"-mit immikkoortup "Qinnuteqarnermut tunngaviummik naatsumik allaaserinera"-ta a-taaniittumit ilaatigut makku erserput:

"Timimigut innarluuteqarnera aallaavigalugu arlaatigut ikiorserneqarnissaa, [...]."

Immersugassani tassani inunnik annertuumik innarluutilinnik ikiorsiisarneq pillugu Inatsisartut peqqussutaanni nr. 10-mi, 31. maj 2010-meersuni § 23 aamma inunnik annertuumik innarluutilinnik ikiorsiisarneq pillugu Nammi-

nersorlutik Oqartussat nalunaarutaanni nr. 8-mi, 25. juni 2014-imeersumi § 64 innersuussutigineqarput.

Immersugassaq "Pisinnaasat – meeqqat inuusuttullu" B-p pisinnaasai pillugit paasisutissanik arlalinnik imaqarpoq. Taakkua saniatigut allattuiffissami alassimavoq "Ullaakkumiit nal. 13:00 tungaanut naammaqaaq, meeqqat ornittagaanniittarami 12:30-16:30 tungaanut".

Immersugassani tassani inunnik annertuumik innarluutilinnik ikiorsiisarneq pillugu Inatsisartut peqqussutaanni nr. 7-imi, 3. november 1994-meersuni § 3 aamma inunnik annertuumik innarluutilinnik ikiorsiisarneq pillugu Namminersorlutik Oqartussat nalunaarutaanni nr. 8-mi, 25. juni 2014-imeersumi §§-it 2-mit 4-mut innersuussutigineqarput.

Kiisalu A-p B-mut iliuusissanut pilersaarut atsiorpaa, oqaatigineqartutullu suliamit erserpoq suliaq 2012-imi aallartissimasoq.

Iliuusissanut pilersaarummi tassani inunnik annertuumik innarluutilinnik ikiorsiisarneq pillugu Inatsisartut peqqussutaanni nr. 10-mi, 31. maj 2010-meersuni § 23 aamma inunnik annertuumik innarluutilinnik ikiorsiisarneq pillugu Namminersorlutik Oqartussat nalunaarutaanni nr. 8-mi, 25. juni 2014-imeersumi § 6 innersuussutigineqarput.

Qaasuitsup Kommuniani illoqarfimmi Z-imi sulisup suliaq e-mailikkut 1. februar 2017-imeersukkut "Meeqqanut, inuusuttunut ilaqutariinnut pina-veersaartitsinermullu tunngasuni siunnersuisoqatigiinnut suliarisassanngortillugu" nassiuppaa, "innarluutilittut nalunaarsorneqarnissaa tapersorsorniarlugu".

Qaasuitsup Kommuniata sapaatit akunnerannut nal. akunneri 37,5-it B-p tapersorsorteqarneranut atugassat meeqqanik inuusuttunillu ikiorsiisarneq pillugu Inatsisartut peqqussutaanni nr. 1-mi, 15. april 2003-meersumi § 9, imm. 2-mi oqaaseqatigiit siulliit innersuussutigalugit akuersissutigai. Akuersissut 1. februar 2017-imi ullulerneqarsimavoq, tulleriinnerili malillugit 6.

aamma 8. februar 2017-imi atsiorneqarsimalluni. Akuersissut A-mut nas-siunneqarsimanersoq erseqqissumik takusinnaanngilara, najugaqarfiummi nalunaarnissaanut allaffissartaqanngilaq, taamatuttaarlu suliami allagaatit allakkanik nassitsissutinik ilaqaratik.

B-p meeqqanik inuusuttunillu ikiorsiisarneq pillugu Inatsisartut peqqussu-taanni nr. 1-imi, 15. april 2003-meersumi § 9, imm. 2, nr. 1 tunngavigalugu tapersersortitut ikiorteqalerneru akueralugu uppersaalluni A 2. februar 2017-imi atsiorpoq.

B pillugu iliuusissanut pilersaarutip 2. februar 2017-imi ullulernerqarsimasup assilinera Isumaginninnermi Naammagittaalliuuteqartarfimmit tiguara. Iliuu-sissanut pilersaarut imatut paasivara B inunnik innarluutilinnik ikiorsiisarneq pillugu malittarisassat tunngavigalugit ikiorserneqarsinnaanersoq qulaajaa-soqarnissaata tungaanut meeqqanik inuusuttunillu ikiorsiisarneq pillugu ma-littarisassat tunngavigalugit tapersersortitut ikiorteqartinneqassasoq.

Qaasuitsup Kommuniata oqaaseqaataani ullunik allattuiffimmi oqaatigine-qarpoq tapersersortitut ikiorti 10. februar 2017-imi aallartissimasoq.

A uannut allakkatigut 10. februar 2017-imeersutigut naammagittaalliorpoq. Naammagittaalliummit ilaatigut makku erserput:

“Naammagittaalliorusuppunga B [...] suliallu pillugit. Oqartussaavungali.

*Aalajangiineq suna, sulisoq kina allalluunniit naammagittaalliuutinni pineqartut allakkit [...]:*

2012/2013 socialimi sulisarsimasut allakkanillu ingerlatsisarsimannngitsut pillugit naamma-gittaalliorusuppunga. Ilungersorlunga anaanatut niviarsiaqqamut B, cpr.nr. [...] allagaqar-tarsimanikka pillugit.

*Susoqarsimanera qangalu tamatuma pisimanera naatsumik allaaserikkrit:*

2012/2013 B støttestaanik allagaqarnera siulleq pivoq, nakorsalli oqaaseqaatai ilaatinne-qarlutik. Tamatuma kingorna innarluutilittut, nangernik arlaatigulluunniit ikiorserneqarta-lernissaanut allagaqartarsimallunga, tamanna pivoq najukkanni socialimi sulisunut apuus-



sisarnikkut. Paasiniartarsimavara suliaq sumut killittoq, oqartarput arriitsumik ingerlasartut utaqqissasunga.

Ukioq 2016 sept./august sulisut nutaartaasut paasiniaavunga sumut killittoqartoq. Tassani takusinnaalersimavarput taamanerniilli 2012/2013 tamatumalu kingorna suliat (allakkat) uninngatiinnarneqartut!!

Ingerlateqqippaat ullorlu una tikippara suli tutsiuttoqarani!

*Aalajangiineq illilluunniit pineqarnerit imaluunniit suliap ilinnut tunngasup sularineqarnera amigaaqartutut sooq isiginerit allaaseriuk:*

Ukiuni taakkunani 2012-2016 utaqqisimanera imaannaanngeqaaq ingappoq paasillugu suliat (allakkat) uninngasimammata.

Piffissaq ikiorneqarnej annertoq annaallugu misigisimangama. Assullu aliatsannarluni anaanaalluni ilungersorluni utaqquarsimalluni kingunera paasillugu suliat uninngasut assut alianaqaaq. Taamaattumik naammagittaalliorusoqaanga ikiorneqarnissara tikillugu, ujar-tuassuara suna pitsaanersoq, angullugulu ujaasisuassuunga.

Ukiuni taakkunani taarsiiffigineqarnissarput pisariaqarsoraara peqqutigimmagu suliat utaqqisavut uninngasimammata, misinnarami ikiorneqarsinnaanissaraluarput annaarujusuarlugu!

*Paasissutissanut ilassutaasinnaasutut isigisannik peqaruit ilanngutikkit*

Paasissutisseerusuppunga pisariaqarsoringakku:

Taarsiiffigineqarnissaq! Uannut meeqqamullu pineqartumut B-mut, cpr.nr. [...] utaqqineq ukiuni 3-4 pigisimangatsigu piffissarlu taama annertutigisoq ikiorneqarnissamut annaasimangatsigu.”

Sulisuma ilaat Qaasuitsup Kommuniata illoqarfimmi Z-imi isumaginnittoqarfiani sulisumut 2017-imi februarimi sianerpoq, sularlu pillugu arlalinnik apeqquteqarluni. Sulisora paasitneqarpoq B inunnik innarluutilinnik ikiorsiisarnej pillugu malittarisassani pineqartunut ilaatinneqarnerisok kommunip suli isummerfigisimangikkaa, nakorsammi oqaaseqaataa kommunip amigaaqartumut. Nakorsap oqaaseqaataa pissarsiarineqarpat suliaq isummerfigisassanngorlugu kommunimi isumaginninnermut ataatsimiititaliamut nas-siunneqartussaavoq.

Suliami allattuiffimmit 24. februar 2017-imeersumit Isumaginninnermi Naammagittaalliuuteqartarfimmit tigusannit erserpoq A kommunimut saaffiginnissimasoq, piffissaq tapersersortitut ikiortip suliffigisartagaa allanngortinniarlugu.

A-p naammagittaalliuutaa Qaasuitsup Kommunianut ingerlateqqillugu allakkatigut 9. marts 2017-imeersutigut nassiuppara. Kommuni qinnuigaara A paninilu sutigut ikiorserneqarnissaminut pisinnaatitaanersut tassunga akeqqullugu.

Qaasuitsup Kommunian ulloq taanna allakkatigut allatigut aammattaaq qinnuigaara suliami allagaatit aamma piffissaq kommunip suliamik suliarinninnerminut atugaa pillugu oqaaseqaat uannut nassiateqqullugit.

A pillugu nakorsap oqaaseqaataa illoqarfimmi Z-imi peqqinnissaqarfimmi nakorsamit 18. marts 2017-imi suliarineqarpoq. Nakorsap oqaaseqaataa taanna Qaasuitsup Kommuniata qanga tigusimaneraa suliami allagaatini tigusanni takusinnaangilara.

Qaasuitsup Kommuniani innarluutilinnut tunngasuni aalajangiisartoqatigiinnut inassuteqaammit 2. maj 2017-imeersumit ilaatigut erserpoq B "innarluutilittut nalunaarsorneqassasoq".

Qaasuitsup Kommuniata suliaq pillugu oqaaseqaat kiisalu suliami allagaatit arlallit uannut allakkatigut 23. august 2017-imeersutigut nassiuppai. Oqaaseqaammit ilaatigut makku erserput:

"Qaasuitsup Kommunianiit illoqarfimmi Z-imi isumaginnittoqarfimmi B pillugu arnaata saaffiginnissutai aallaavigalugit paasissutissat nassuiaatigineri imatut ipput:

23.09.13 nunaqarfimmit X-imit saaffiginnissutigineqarsimavoq støtteqalernissaanut tunngatillugu arnaata saaffiginnissutaa tunngavigalugu.

Ullormi tassani sullissisuata nunaqarfimmut X-imut tamanna tunngavigalugu utertisimavoq paasissutissanik nakorsamiit arlaannik takussutissaqarnersut paasiniaalluni, maani

meeqqap immikkut tapersersortariaqarnera pillugu nakorsamiit innersuusummik tingusaqarnikuunnginnatta.

Nakorsap oqaaseqaataa nunaqarfimmi X-imi ullulik 17.10.13 pigisimavaat. Paasinngilara maanga apuussimanersoq. Nakorsap oqaaseqaataa ulloqartoq 5. februar 2014 tiguneqarsimavoq, sullissisumut ingerlanneqarsimalluni.

2015-mi ikiorsiissutinik ilaqutariit ikiorserneqartarsimapput, ilaatigut meeqqamut nanginut aningaasartuutissaanut taperneqarluni.

23.12.16 ikiorsiissutilerisuniit innarluutilittut nalunaarsorneqarnissaa pillugu eqqaasitsisoqarsimavoq.

01.02.17 meeraq pillugu anaanaasup saaffiginnissutaa MISI [...] -miit allagaq takkuppoq, [...].

Suliaq misissorneqarpoq siusinnerusukkut suliakkiusaaq qanoq ingerlasimanersoq. Meeraq pillugu paasissutissanik nunaqarfimmi X-imi sullissisumut piniarnermi nakorsaq oqaaseqaasiortinneqarsimavoq, taannalu innarluutilinnut sullissisumut ingerlateqqinneqarsimavoq sulisoqarnerli pissutaalluni uninngatinneqarsimammat suliaq aallarteqqinneqarluni december 2016.

Maannamuugallartoq innarluutilittut nalunaarsorneqarnissaata tungaanut aalajangerneqarpoq meeqqanik inuusuttunillu sullissivimmiit tapersersorteqarnissaa suliarineqassasoq, innarluutilinnik sullissivimmiit nalunaaruteqartoqarnissaata tungaanut. Tapersersorteqarnissaanullu immersugassaq immersorlugu nunaqarfimmi X-imi sullissivimmut ingerlateqqinneqarpoq inaangassanngorlungu.

6. februar 2017 støtteqalernissaanut immersugaq naammassivoq. 10. februar 2017 meeqqat inuusuttullu peqqussutaata ataani innarluutilittut nalunaarsorneqarnissaata tungaanut støttepersonilerneqarluni.

Innarluutilittut nalunaarsorneqarnissaanut paasissutissat maj 2017 illoqarfimmut Y-mut nassiunneqarsimapput (nassiunnerani ullua ersinnginnami). Innarluutilittut nalunaarsorneqarnissaanut beslutningsteamimut. Angajoqqaat nutaamik nalunaarsugaanisaanut 26.01.2017 qinnuteqaat atsiorsimavaat.

Handicap sagsbehandlereqanngittarnerani suliaq unittarsimalluni. Aatsaat maj 2017 ingerlanerani pappilissat B pillugu innarluutilittut nalunaarsornissaanut paasissutissat illoqarfimmut Y-mi beslutningsteamimut ingerlatinneqarsimallutik.”

Qaasuitsup Kommuniani innarluutilinnut tunngasuni aalajangiisartoqatigiit B "innarluutilit pillugit peqqussummi pineqartunut ilaatinneqalissasoq" 5. september 2017-imi akueraat, tapersersortitummi ikiortimik pisariaqartit-simmat. Tamanna inunnik annertuumik innarluutilinnik ikiorsiisarneq pillugu Inatsisartut peqqussutaanni nr. 7-imi, 3. november 1994-imeersumi § 3 aamma inunnik annertuumik innarluutilinnik ikiorsiisarneq pillugu Nammi-nersorlutik Oqartussat nalunaarutaanni nr. 8-mi, 25. juni 2014-imeersumi § 5 innersuussutigalugit pivoq.

Ullut allattorsimaffianni 15. september 2017-imi makku allassimapput: "Siu-littaasup innarluutilittut nalunaarsuinissamik aalajangiinera tikippoq".

Qaasuitsup Kommuniata aalajangiinerata 16. januar 2017-imi ullulerneqar-simasup A-lli oqarneratut aatsaat 25. oktober 2017-imi tigusimasaata assili-nera Isumaginninnermi Naammagittaalliuuteqartarfimmit tiguara. Aalaja-ngiineq taanna aalajangiinermi 5. september 2017-imeersumi eqqaaneqar-mat aalajangiinerup 2017-imi ukiakkumeersuunerata eqqortuunera tunnga-viutippara. Aalajangiinermi ilaatigut makku erserput:

**"Una pillugu: Kommunip innarluutilit pillugit peqqussum naapertorlugu pineqa-lernissamik aalajangiinera**

Qaasuitsup Kommuniani qitiusumik inunnik isumaginninnermik ingerlatsiviup aalajangi-iisartoqatigiivi ulloq 5. september 2017 ataatsimiinnermini annertuumik innarluutilit ikior-serneqartarnerat pillugu Inatsisartut peqqussutaat nr. 7, 3. november 1994-imeersoq § 3 aammalu hjemmestyrets bekendtgørelse nr. 8 af 25. juni 2014 om hjælp til personer med vidtgående handicap § 5 naapertorlugu pineqalernissaanik qinnuteqaat suliaraa.

Naliliineq aalajangiinermut tunngavigineqartoq toqqammaveqarpoq nakorsanit paasissu-tissat tunngavigalugit, qanoq piginnaaneqassutsimut immersugassaq, iliuusissatut pilersaarut kiisalu suliaq pillugu paasissutissat allat.

Aalajangiisartoqatigiit kommunalbestyrelsi sinnerlugu illit ulloq 5. september 2017 aallar-nerfigalugu annertuumik innarluutilit pillugit peqqussum naapertorlugu pineqalissasutit aa-lajangiuppaat.

Aalajangiussineq toqqammaveqarpoq [...] -mik innarluuteqarnerit, taamaattumik innarluutilittut støttepersoneqarnissat pisariaqarluni, innarluuteqalersimanerit piginnaassutsikkullu amigalersimanerit taamaattumik pisinnaatitaaffigivat ikiorserneqarnissarnut innarluutilittut, innarluutilittut ikiorserneqartarnerat pillugu Inatsisartut peqqussutaat nr. 7, 3. november 1994-imeersoq naapertorlugu, aammalu hjemmestyrets bekendtgørelse nr. 8 af 25. juni 2014 om hjælp til personer med vidtgående handicap § 5. Ikiorserneqarnissap qanoq annertutiginnissaa illoqarfigisanni inunnik isumaginnittoqarfik aqutugalugu nalilerneqasaaq, tamatumani aalajangiineq Isumaginninnermi Naammagittaalliuteqartarfirmut naammagittaalliutigisinnaavat.”

Qaasuitsup Kommuniata oqaaseqaataa A-mut allakkatigut 3. november 2017-imeersutigut suliami illuaʼtungiusup isumaanik tusarniaatit nassiuppara.

K Kommunip allakkatigut 5. februar 2018-imeersutigut arlalinnik apeqquteqarfigaara. Qaasuitsup Kommunianik allaffigeqatiginnittarsimanera siulliullugu eqikkarpara, tamatumunngalu uiggiullugu ilaatigut imatut allallunga:

“Paasissutissalli nassiunneqartut misissoreerlugit isumaqarpunga suliap ingerlasimanera pillugu pisariaqarneratut annertutigisumik sulii paasitineqarsimananga. Taamaattumik tulliuttuni takuneqarsinnaasutut suliaq pillugu amerlanerusunik apeqqutissaqarpunga.

A nunaqarfimmi X-imi najugaqarpoq, allagaatillu tigoreersimasakka aallaavigalugit suliaq imatut paasivara suliaq tassani suliarineqarsimanerimi saniatigut illoqarfimmi Z-imi aamma suliarineqarsimasoq.

Taamaattumik Qaasuitsup Kommuniata 1. januar 2018-imi avinneqarsimanera pissutigalugu apeqqutikka K Kommunimut ingerlatippakka.

## **Apeqqutikka il.il.**

### **1. Suliami allagaatit**

Suliami allagaatit [...] Qaasuitsup Kommunianit allakkatigut 23. august 2017-imeersutigut oqaatigineqartut tiguakka. Paasissutissalli nassiunneqartut aallaavigalugit isumaqarpunga suliami allagaatinik allanik suliap suliarineqarneranut soqutiginaateqartunik peqarsinnaanera ilimanartoq.

Tamatumunnga manna ilaatigut pissutaavoq, tassalu paasissutissani nassiunneqartuni oqaatigineqartoq A ikiorserneqarnissaminik 2012-imi qinnuteqaateqarsimasoq. Iliusissa-

nut pilersaarut 26. januar 2017-imeersoq ilaatigut innersuussutigaaara. Suliamili allagaatit nassiunneqartut allagaatinik 2013-imi september sioqqullugumeersunik ilaqanngillat.

Qaasuitsup Kommuniata allagaanit 23. august 2017-imeersunit aammattaaq erserpoq A 2015-imi nangersinissaminut ikiorserneqarsimasoq. Suliamili allagaatinik 2015-imeersunik tigusaqanngilanga.

Taamaattumik K Kommuni qinnuigaara suliami allagaatit misissoqqeqqullugit, suliami allagaatinik suliap suliarineqarnerani atorneqartussanik uanga sulii tigusi manngisannik, matumani kommunip toqqorsivia ilanngullugu eqqarsaatigalugu, peqarnerisq inaarutaasumik gulaajaasogarnissaa siunertaralu.

Kommunip sulianik suliarinneriaasiani suliat arlallit B-p ikiorserneqarnissaanik qinnuteqaat pillugu paasissutissanik imaqartut ilaappata kommuni qinnuigaara suliani taakkunani allagaatit tamaasa uannut nassuteqqullugit. Oqaatigaara K Kommunip nunaqarfimmi X-imi allaffia suliami allagaatinik peqarpat aamma taakku uannut nassuteqqugikka.

## **2. Ullut suliami iliuuseqarfiusimasut allattorsimaffiat**

K Kommuni aammattaaq qinnuigaara ullut suliami iliuuseqarfiusimasut tamarmik allattorsimaffiat uannut nassuteqqullugu, matumani A-p suliap ingerlaneranik paasitneqarfigisarsimasai ilanngullugit eqqarsaatigalugit.

## **3. Oqaaseqaat**

**3.1.** K Kommuni aamma qinnuigaara suliaq pillugu oqaaseqaateqaqqullugu.

K Kommuni qinnuigaara A-p B-mut ikiorsiissutit suut qinnuteqaatigisimanerai oqaaseqaammii sukumiinerusumik nassuiaqqullugu. Kommuni aamma qinnuigaara manna pillugu nassuiaateqaqqullugu, tassalu Qaasuitsup Kommunian imaluunniit K Kommunip qinnuteqaatit taakku tunngavigalugit sunik aalajangiisimanersoq.

**3.2.** Suliap ilai sulii suliarineqarpata K Kommuni qinnuigaara tamanna pillugu nassuiaateqaqqullugu.

**3.3.** Paasissutissat massakut tigusi masakka aallaavigalugit imaassoraara suliap ilai ukiut arlallit suliarineqarsimasut. K Kommuni tamanna tunngavigalugu qinnuigaara piffissap taama sivisutigisup suliamik suliarinninnermut atorneqarsimanera pillugu nassuiaateqaqqullugu.

Kommuni tamatumunnga atatillugu aamma qinnuigaara Qaasuitsup Kommunian imaluunniit K Kommuni suliap suliarineqarnera sukkanerulersinniarlugu sunik iliuuseqarsimanini pillugu nassuiaateqaqqullugu.

**3.4.** K Kommuni tamatumunnga uiggiullugu qinnuigaara manna pillugu nassuiaateqaqqullugu, tassalu kommunip paasinninnera unaanersoq suliamik suliarinninneq – pingaartumik piffissaq suliamik suliarinninnermut atorneqartoq A-mullu ingerlaavartumik ilisimatitsisoqartarsimanginnera immikkut eqqarsaatigalugit – ingerlatsinermi ileqqorissaarnermut naapertuuttusoq.”

K Kommunip e-mailikkut 16. juli 2018-imeersukkut suliami allagaatinik arla-linnik ilaqartinneqartukkut suliaq pillugu oqaaseqaat uannut nassiuppaa. Oqaaseqaammit ilaatigut makku erserput:

“Paasissutissat 23. august 2017-imi nassiunneqartut nassiuteqqinneqarput. Allakkat nr. 17.3-134 pillugit nassuiaat suliarineqarsimavoq [Qaasuitsup Kommuniata allagai; uanga ilanngussara], taannalu ullut allattorsimaffianni ilanngunneqarpoq. Aamma nunaqarfimmi X-imi 14.10.2013-imi oqaloqatigiinneq pillugu allakkiaq, taannalu ilaqutariinni pissutsit qanoq innersut nakorsarlu meeraq pillugu oqaaseqaateqarsimanersoq anaanaasumik oqaloqatiginninnermut tunngasuuvog.

Innarluutilinnik nalunaarsuiniarneq ajoraluartumik assut arriissimavoq, tassami innarluutilinnik sullissisoqarsimangimmat. Innarluutilittut nalunaarsorneqarnissap tungaanut meeqqat pillugit inatsit tunngavigalugu tapersersortitut ajoraluartumik aamma ikiortiliisoqartarsimangilaq. Meerarli 10. februar 2017-imi tapersersortitut ikiortitaarpoq.

Tapersersortitut ikiortiliiniarnermi innarluutilittullu nalunaarsuiniarnermi piffissap suliamik suliarinninnermut atorneqartup ajoraluartumik taama sivisutiginera aamma ingerlatsinermi ileqqorissaarnerunngilaq.

A suliami illua'tungiusutut isumaanik tusarniaavigeerusiuk suliamilu aalajangiisoqareerpat suliaq qanoq inernilerneqarnera pillugu oqaaseqaateqaqqullusi qinnuigisinnaavassi, paasissutissat amerlanerusut qinnutigineqanngippata.” (Ombudsmandeqarfimmi nutsigaavoq)

E-mailimi takuneqarsinnaasutut suliami pisimasut ulluisa allattorsimaffiat ilanngullugu nassiunneqarpoq. Ullunik allattuiffimmit makku erserput:

23.09.13	Anaanaasoq nunaqarfimmi X-imi saaffiginnippoq, B-mut tapersersortitaarniarluni
14.10.13	Anaanaasumik oqaloqateqarneq, ilaqutariinni pissutsit nakorsarlu meeraq pillugu oqaaseqaateqarsimanersoq paasiniarlugu. Paasiniarniarpaa.

17.10.13	Nakorsap oqaaseqaataa nunaqarfimmi X-imi tigusi-mavaat
05.02.14	Nakorsap oqaaseqaataa tiguneqarpoq sullissisumullu ingerlateqqillugu tunniunneqarluni
2015	Pisortanit ikiorsiissutit nalinginnaasut saniatigut nangersiutissaminik ikiorserneqarsimavoq
23.12.16	Meeraq innarluutilittut nalunaarsorneqassasoq sullissisumut eqqaasitsissutigineqarpoq.
01.02.17	MISI-p allagai tiguneqarput, innarluutilinnillu sivi-soorsuarmik sullissisoqarsimanngimmat suliaq uningatinneqarsimavoq. Aalajangiisoqarporli innarluutilittut nalunaarsuisoqarnissaata tungaanut tapersersortitut ikiortiliisoqassasoq.
06.02.17	Tapersersortitaarnissaanut akuersissut suliarineqarpoq
10.02.17	Tapersersortitut ikiorteqartitsineq aallartippoq
Maj 2017	Innarluutilittut nalunaarsuinissamik suliaq aalajangiisartoqatigiinnut nassiunneqarpoq
15-09-17	Innarluutilittut nalunaarsuisoqarnissaanik siulittaasup aalajangiinera tiguneqarpoq

(Ombudsmandeqarfimmi nutsigaavoq)

Sulisuma ilaat K Kommunimut 11. september 2018-imi sianerpoq, oqaatigalugulu ullut allattorsimaffiannit ersertoq A kommunimit 2015-imi ikiorserneqarsimasoq takuneqarsinnaasoq, Ombudsmandeqarfilli suliami allagaatinik 2015-imeersunit tigusaqarsimanngitsoq. Sulisora paasitinneqarpoq ilumoor-toq A ikiorserneqarsimasoq, kommunili suliami tamanna pillugu allagaatinik nassaarsinnaasimangitsoq.

K Kommunip oqaaseqaataa ullunillu allattuiffik A-mut allakkatigut 13. september 2018-imeersutigut suliami illua'tungiusup isumaanik tusarniaatitut nassiuppara.

Sulisuma ilaat K Kommunimut 24. oktober 2018-imi sianeqqippoq, oqaatigalugulu pisut arlallit ullunik allattuiffimmi eqqaaneqartut – soorlu 17. oktober 2013-imi, 5. februar 2014-imi, 23. december 2016-imi aamma 15. september 2017-imi – suliami allagaatini Ombudsmandeqarfiup Qaasuitsup



Kommunianit aamma K Kommunimit piffissap taamaalinerani tigusimasaani uppersaatitaqanngitsut. Taamaattumik suliame allagaatinik Ombudsmandeqarfiup suli tigusimannngisaanik peqarnerseq sulisuma apequtigaa. Kommunimi sulisup oqaatigaa suliap misissorneqarnissaa allagaatillu amigaataasinnaasut nassiunneqarnissaat kommunip isumaginiaraa.

Sulisup suliap K Kommunip 16. juli 2018-imi oqaaseqaateqarneranit ingerlasimanera pillugu oqarpoq Qaasuitsup Kommunian 18. september 2017-imi aalajangiisimasoq B inunnik innarluutilinnik ikiorsiisarneq pillugu malittarisassani pineqartunut ilaatinneqartoq.

Tamanna tunngavigalugu faxikkut nassiussaq K Kommunimit 24. oktober 2018-imi tiguara. Faximit tassanga ilaatigut makku erserput:

“Paasissutissat makku matumuuna nassiunneqarput:

Innarluutilittut nalunaarsuisoqarnissaanik qinnuteqaat (10-01-2014-imi immersorneqarsimasoq, taanna illoqarfimmi Y-mi aalajangiisartoqatigiinnut nassiunneqarsimanersoq imaaliallaannaq takuneqarsinnaanngilaq. Aalajangiisartoqatigiinnut 2014-imi nassiunneqarsimanersoq apequtigaa).

Innarluutilittut nalunaarsuisoqarnissaanik aalajangiineq 05.09.2017-imeersoq.

Nakorsap 18/3-2017-imit innarluutilittut nalunaarsuisoqarneranut atatillugu oqaaseqaataa.

Isumaginninnermi Naammagittaalliuuteqartarfimmut naammagittaalliuutit tunuarterneqarnera. 11.01.18-imi. Tapersersortiliiniarneq aamma pisortanit ikiorsiissutinik itigartitsineq naammagittaalliuutigisimavai. Naammagittaalliuunni oqarasuaatikkut 10.01.18-imi tunuartissimavaa, panimmi tapersersorteqarnissaa kommunip akuersissutigisimammagu. Ikiorsiissutinik itigartitsineq pillugu naammagittaalliuut aamma tunuartippaa.

Nakorsap oqaaseqaataa ullut allattorsimaffianni 17.10.13-imi taaneqartoq nunaqarfimmi X-imi sulisumut/sullissumut ujartikkaluarpara. Taassumali nanisinnaasimannngilaa. Oqaaseqaat B pillugu suliame maani illoqarfimmi Z-imiittumi aamma ilaanngilaq.” (Ombudsmandeqarfimmi nutsigaavoq)

Takuneqarsinnaasutut suliami allagaatit arlallit faximut tassunga ilanngullugit nassiunneqarsimapput.

Suliami allagaatit arlallit Isumaginninnermi Naammagittaalliuuteqartarfimmit 26. oktober 2018-imi pissarsiaraakka, taakkunani ilaallutik allagaatit kommuninit tigusimanngisakka – ilaatigut suliami allattuiffiit 23-t aamma “innarluutilittut nalunaarsuineq” pillugu aalajangiineq 2017-imi ukiakku-meersoq, taannalu siusinnerusukkut issuarneqarpoq. A-p ilaatigut aalajangiineq taanna Naammagittaalliuuteqartarfimmut 2017-imi oktoberimi naammagittaalliuutigisimavaa. Paasivara aalajangiinerup assilineru A-p Naammagittaalliuuteqartarfimmut naammagittaalliuutaanut ilanngullugu nassiunneqarsimasoq, suliamilu allagaatit Naammagittaalliuuteqartarfiup Qaasuitsup Kommunianit 2017-imi oktoberimi pissarsiariniarsimagai. Naammagittaalliuutitut suliap taassuma Naammagittaalliuuteqartarfimmi suliarineqarnera 2018-imi januarimi unitsinneqarpoq, A-p naammagittaalliuunni tunuartimmagu.

Sulisuma ilaat K Kommunimut 5. november 2018-imi sianerpoq. Kommunimi sulisup oqaatigaa suliami allagaatit arlallit, soorlu nakorsap oqaaseqaatai, nassaarineqarsinnaanngitsut. Aammattaaq suliamik nalunaarsuiffimmi pisariaqarneratut allattuisoqartarsimanngilaaq. Sulisup taassuma oqaatigaa suliat aalajangersimasut kommunip toqqorsivianeeratarsinnaasut.

Sulisuma ilaat K Kommunimut 8. november 2018-imi sianeqqippoq, oqaatigalugulu suliami allagaatit arlallit kommunimit tigusimanngisakka Isumaginninnermi Naammagittaalliuuteqartarfimmit tigusimagikka. Sulisuma K Kommunimi aammattaaq aperaa allagaatinik suliamut matumunnga tunngasunik kommunip allaffiata avataani toqqorsivimmi peqarnersoq K Kommunip misissorsimaneraa. K Kommunimi sulisup oqaatigaa suliat inersimasunut tunngasut nunaqarfimmut – matumani nunaqarfimmut X-imut – nassiunneqartartut – sulialli meeqqanut tunngasut illoqarfimmi Z-imi toqqortarineqartarlutik. Nunaqarfimmi X-imi toqqorsivik kommunip misissuiffigisimaneraa sulisup nalornivaa. Suliaq B-mut tunngasoq misissorneqarsimavoq, suliamili allagaatinik suliamut A-mut tunngasumut kukkunikkut ikineqarsimasunik

nunaqarfimmi X-imi peqarsinnaavoq. Suliami allagaatit taamaattut, uanga paasisattut, Ombudsmandeqarfimmut nassiunneqanngitsoorsimasinnaaput. Taakkua saniatigut kommunip allaffiata illoqarfimmi Z-imiittup qaliani kommunip toqqorsivia misissorneqarsimanngilaq.

## **OQAASEQAAMMUT MALITSEQARTITSINEQ**

K Kommuni e-mailia 8. september 2019-imi tiguara. Kommuni ilaatigut imatut allappoq:

### **"Ombudsmandip piffissaq suliamik suliarinninnermut atorneqartoq pil-lugu oqaaseqaateqagqusineranut akissut j.nr. 2017-104-0047**

Suliami aalajangersimasumi piffissaq suliarinninnermut atorneqartoq sivosooq K Kommuni sunik isumaliutersuuteqarnissaanut pissutissaqalersitsineranik Ombudsmandip oqaaseqaateqagqusineranut atatillugu ataani akissuteqarpugut.

K Kommuni assut ajuusaarutigaa suliaq kommunit marluk aqqusaarlugit ukiullu sisamat sinnerlugit suliarineqarsimammat. Tamanna ilungersunartorujussuartut isigaarput, 2019-imilu septemberip naalernerani sulisunik isumasioqatigiissitsinermi oqallisigineqassalluni.

K Kommuni Ombudsmandimit naammagittaalliuutinik arlalinnik Ombudsmandimit tigusaqartarsimammat kukkunerpassuit sulianillu sivisuallaamik suliarinnittarnerit tunngavigalugit kommunip qanoq iliorniarnernanik ujartuilluni, suliaassarfimmi tamarmi sulianik suliarinnittarnermi atugassanik sulianik suliarinneariaatsinik, suliat ingerlasarnerisa allaaserineqarnerinik, nakkutilliinermi nalunaarsuiffinnik il.il. ineriartortitsineq maanna ingerlanneqarpoq. Taamaaliornikkut neriuutigineqarpoq tamakku aqqutigalugit sulisut suliaminnut atatillugu suliaminnik naammassinninnissaminnut piukkunnarnerulissasut, taamatullu aamma suliffiup iluani oqallinnernik aallartitsisoqarsinnaassasoq pitsaassutsimik qaffassaaqataasinnaasunik, taamalu sulianik suliarinnittarnermi kukkunernik ikinnerulersitsisinaasunik. Tamanna isumasioqatigiinnissami aggersumi aamma oqallisigineqarumaarpoq.

Pilersaarutaavortaaq illoqarfinni kingusinnerusukkullu nunaqarfinni sulianik suliarinnittartut atortussat suliarineqarsimasut atornissaannut najukkani pikkorissartitsisoqartarnissaa sanileqarlunilu ilinniartitsisoqartarnissaa 2019-imi ukiakkut aallartittumik, taamaalilluni kommunimi sulianik suliarinnittartut sulianik suliarinnissaminnut pisariaqartunik piginnaasaqalerniassammata.

Soorunami aamma oqaatigineqassaaq K Kommuni immikkut ajornartorsiuteqarmat sulisussanik sulianut piginnaasalinnik pissarsiniarnissaminut, taamaattumillu tamatumani kommunip suliniarnini annertusisissimallugu immikkoortortanit ataasiakkaanit namminernit qitiusumillu ingerlatsivimmit aqutsinermik nakkutillinermik aaqqissuussaanagerusumik timitaliinikkut. Tamatuma saniatigut sulianik suliarinnittartumik isumaginninnermi siunnersortitut ilinniagalimmik angalassartussamik ataatsimik atorfinitsitsisoqarsimavoq, kingusinnerusukkut aamma ataatsimik ilaqqinneqartussamik, minnerunngitsumik suliani oqimaatsuni illoqarfinni nunaqarfinnilu tamani Ilaqutariinnut Immikkoortortaqarfinni sulisunut ikior-taasussanik, taamatullu aamma sulisunik pisariaqartunik suliatigut piginnaasaqanngitsunik issiaqatigalugit ilinniartitsisussanik, tamannalu assut neriulluarfi-gaarput.

Minnerunngitsumik illoqarfimmi Z-imi [kommunip ilaani; uanga ilanngussara] aasap ingerlanerani inuttut pissuteqarlutik, ilinnialerneq pissutigalugu, suliat amerlassusii pissutigalugit, sulisoqarnikkut pissutsit ajornerat il.il. pissutigalugit sulisut arlallit soraarniuteqarsimapput tamannalu pissutigalugu suliat utaqqisut amerliartuinnavissut annikillisinneqarnissaat siunertaralugu avataaniit ikiorserneqarsinnaanissamik pisariaqartitsineq K Kommunip taamatuttaaq nalilersorniar-paa, tamannalu suliassaq aamma aallartittussaavarput.

K Kommunip neriutigaq suliaq manna aamma peqataajumaartoq sulianik suliarinnittarnerup pitsaanerulerneranut, pitsaassutsip qaffassarneqarneranut minnerunngitsumillu kukkunerit annikillisarneqarnissaannut, taamaalilluni innuttaasut ingerlatsinermi ileqqussat pitsaasut malillugit eqqortumik sullinneqarsinnaaniasammata, taamaalillunilu suliat pisariaqarneranit sivilunerusumik suliarineqartannginniassammata, taamatullu aamma isumaqarluta sulisussanik amigaaqar-neq immiini tunngavilersuutaasinnaangitsoq suliat ataasiakkaat ukiut arlerlugit suliarineqartarsimanerannut.” (Ombudsmandeqarfimmi nutsigaavoq)

K Kommuni 11. december 2019-imi nalunaarfigaara suliamik suliarinninnera unitsikkiga.

K Kommunip uannut akissutaata uangalu K Kommunimut allakkama assilineri A-mut ulloq taanna nassiuppakka.